

## Edizioni

- letto 424 volte

## Bartsch-Koschwitz

I.

Domna, dels angels regina,  
esperansa dels crezens,  
segon que·m comanda sens,  
chan de vos lenga romana;  
quar nulhs hom justz ni peccaire  
de vos lauzar no·s deu traire,  
cum sos sens mielhs l'aparelha,  
romas o lenga latina.

II.

Domna, roza ses espina,  
sobre totas flors olens,  
verga seca frug fazens,  
terra que ses labor grana,  
estela, del solelh maire,  
noirissa del vostre paire,  
el mon nulha no·us semelha  
ni londana ni vezina.

III.

Domna, joves, infantina,  
fos a Dieu obediens  
en totz sos comandamens,  
per que la gens crestiana,  
cre ver e sap tot l'afaire  
que·us dis l'angels saludaire,  
quan receubs per l'aurelha  
Dieu, cui enfantes vergina.

IV.

Domna, verges pura e fina,  
ans que fos l'enfamtamens,  
et apres tot eissamens,  
receup en vos carn humana

Jesu Crist, nostre salvaire,  
si com ses trencamen faire  
intra·l bels rais, quan solelha,  
per la fenestra veirina.

V.

Domna, vos etz l'aigentina  
que trobet vert Moysens  
entre las flamas ardens,  
e la toizos de la lana  
que·s moillet dins la sec'aire,  
don Gedons fon proaire;  
e natura·s meravelha  
com remazetz intaizina.

VI.

Domna, estela marina  
de las autras plus luzens,  
la mars nos combat e·l vens;  
mostra nos via certana:  
car si·ns vols a bon port traire,  
non tem nau ni gouvernaire  
ni tempest que·ns destorbelha  
ni·l sobern de la marina.

VII.

Domna, metges e mezina,  
lectoris et enguens,  
los nafratz de mort guirens,  
l'avilheje (?) onh e sana;  
doussa, pia, de bon aire,  
vos me faitz de mal estraire;  
quar perdutz es qui somelha,  
que la mortz l'es trop vezina.

VIII.

Domna, espoza, filh' e maire,  
manda·l filh e prega·l paire,  
ab l'espos parl'e conselha,  
com merces nos si'aizina.

IX.

Nos dormem, mas tu·ns revelha,  
ans que·ns sia mortz vezina.

- letto 372 volte

**Source URL:** <https://letteraturaeuropea.let.uniroma1.it/?q=laboratorio/edizioni-810>